



Sesida dals

8 da mars 2022

Communitgà ils

9 da mars 2022

Protocol nr.

206/2022

Incumbensa Widmer (Favugn)

concernent l'Educaziun sexuala 2.0 en la scola populara

Resposta da la Regenza

L'educaziun sexuala rinforza la conscienza da sasez e l'autodeterminaziun dals uffants e dals giuvenils ed ha uschia er in effect preventiv cunter violaziuns da l'integritad sexuala/violenza, cunter gravidanzas nunplanisadas/nungiavischadas e cunter malsognas sexualas. L'educaziun sexuala è ina incumbensa da cooperaziun da las personas responsablas per l'educaziun, da las personas d'instrucziun sco er d'expertas ed experts externs.

Tar il punct 1: La Conferenza da las presidentas e dals presidents dal Cussegl grond ha concludì da tractar las petiziuns dal 4. Parlament da mattas 2021 l'emprim da tut en il Cussegl grond. L'incumbensa qua avant maun ha ussa anticipà la tematica da la petiziun dal medem num.

Tar ils puncts 2 e 4: En il Plan d'instrucziun 21 GR vegn tractà il tema "Identitad, corp, sanadad – s'enconuscher ed avair quità da sasez" gia a partir dal stgalim da la scolina. Il med d'instrucziun "NaTec" è vegnì declerà sco obligatoric sin il stgalim primar. Sin il stgalim superiur chatta quest med d'instrucziun – cun "NaTec 7, 8 e 9" – ina cuntinuaziun raschunaivla. Quest med d'instrucziun actual garantescha ch'ils temas ch'èn menziunads en l'incumbensa, vegnan tractads resguardond la vegliadetgna ed en moda pli detagliada. Il chantun Grischun sustegna plinavant la purschida da pedagogia sexuala da l'uniun Adebar en las scolas dal chantun Grischun.

Tar il punct 3: Il tema educaziun sexuala è ina part da la scolaziun da basa a las differentas scolas autas da pedagogia ed el è er vegnì integrà en las furmaziuns supplementaras tar il Plan d'instrucziun 21 GR. Uschia han lieu actualmain en l'entir chantun occurrenzas obligatorias da furmaziun supplementara per ils teams da chasas da scola dal stgalim primar. Questas occurrenzas accumpognan l'introduc-

ziun dal med d'instrucziun "NaTec". Quest med d'instrucziun cumpiglia l'instrucziun da l'educaziun sexuala.

Tar il punct 5: Sin plaun interchantunal vegnan rimnads ils giavischs per adattaziuns dal Plan d'instrucziun 21, e quai per tut ils trais tips da la scola populara. Er l'educaziun sexuala n'è betg en emprima lingia in tema singular specific per il Grischun. Per quest motiv duai el vegnir tematisà er en cooperaziun cun auters chantuns ed eventualmain integrà sin questa via en il proxim repassament dal Plan d'instrucziun 21.

Sa basond sin questas explicaziuns propona la Regenza al Cussegl grond da midar questa incumbensa sco suonda:

Punct 1: La petiziun Educaziun sexuala 2.0 en la scola populara vegn tractada cun l'urgenza necessaria, sch'il Cussegl grond l'accepta per mauns da la Regenza.

Puncts 2 e 4: L'Uffizi per la scola populara ed il sport (USS) sensibilisescha ils purtaders da scola cun agid da circularas sco er a chaschun da las sesidas da quartal cun tut las direcziuns da las scolas dal chantun Grischun, per il tema "educaziun sexuala" en la scola populara a partir da la scolina. Il USS infurmescha plinavant davart las purschidas d'expertas ed experts externs sco er davart las pussaivladads da furnaziun supplementara per persunas d'instrucziun. La finala infurmescha il USS che las scolas pon porscher dis tematics davart l'educaziun sexuala integrond expertas ed experts, e ch'ils geniturs duain vegnir consultads avant questas occurrenzas en ina moda adattada (p.ex. sairas da geniturs).

Punct 3: La Scola auta da pedagogia dal Grischun vegn a sviluppar ina purschida da furnaziun supplementara confurma als basegns, che po vegnir tratga a niz dals purtaders da scola en il rom da la furnaziun supplementara obligatorica entaifer la scola.

Punct 5: Il USS infurmescha il stgalim da la scolina davart l'effect da la pedagogia sexuala, er areguard la protecziun cunter abus sexual, e davart las purschidas d'expertas ed experts externs sco er davart las pussaivladads da furnaziun supplementara per las persunas d'instrucziun.



En num da la Regenza

Il president:

Marcus Caduff

Il cancellier:

Daniel Spadin